

LI LEUP ET LES BIERDJIS.

L. X 5. d'après Jean de la Fontaine.

Onk dès pus vîs soçons di tote li binde di leups
Qui fyin.n' on rude ravadje dispû one masse d'anéyes
Sinteut s' fin ariver. Po djouwer l' drwèt do djeu,
Fé s't-ègzamin d' consyince, c'èst d'tchinde jusqu'à l' valéye.
« Lès-omes èt lès coméres, lès tchèsseûs èt leûs tchins,
Tot l' monde nos veut èvi ossi lon qu'on rècule !
On nos traîte di bandits, di voleûrs èt d' vaurins
Sins veûy èt sins conèche, il ont rade fait l' cârcul.
Por on bèdot d' malade, on baudèt qui n' sièt pus,
On lapin qu' va crèver, deûs trwès pouyes qu'ont l' pèpîye,
Si nos n' sèrin.n' nin là, i l'zî faureut couru
Après l' vètèrinaîre qu'i faut qu'on s'è d'mèfiye.
Mins pusqui c'è-st-insi, d' nos djoûs, qui l' musique va,
Vo-nos-ci oblidjîs d' candjî nos-abutudes :
Putôt qui d' ramasser ç' qui trin.ne pâr ci pâr là,
Quite à mougî dès yèbes, tot ç' qui vike, on passe yute.
Ci n'èst nin l' fin do monde, di s' sognî ôtrumint,
Ça nos pout r'mète di sqwêre avou l' ci qu' nos cotchèsse. »
Ragaîyi, fiér di li, nosse leup r'mawîye bèlemint
Tot ç' qu'i l'zeû va prêchî , aus-ôtes, po-z-î t'nu tièsse.
Sins brût, su sès tchaussètes, i sôrtit foû do bwès ;
I lî chone qu'i vint d' sinte one inéye di cûjène !
À saquants mètes di li, lès bièrdjîs sont zèls trwès,
Achîds pa-d'avant l' grèyî qu'on-z-î brûle dès racènes ;
Padrî, su on drap d' mwin, on' agna dismousî
Ratind qui l' feu s' rapauje : i vont plu fé payîye !
« Ça fait qui mi, li leup, dji m' rastrindreu d' mougî
Po l'zeû lèyî rosti ç' què l'zî sièt d' compagnîye ?

Gn-aureut d' qwè yèsse jin.né, ni s' pus wasu mostrer !
Qu'on n' mi lome pus pa m' nom si dj' n'atrape nin l' bèdéye !
Quite à fé on distoû à plat vinte, èt ramper,
Aper l' bièsse èt l' trossî à grandès-asdjambléyes.»
I n' faleut wêre di tchôse, nosse leup î a r'pris gout ;
I n' si continterè nin d'on din.ner si lèdjêr !
Po r'trover lès parints, i va fé tot ç' qu'i pout,
Èt qu'on dîye tot ç' qu'on vout, i r'toûne à rastacwêre.
Li leup a yeû raïson, tûzans one miète pus lon !
Tot ç' qui nos vlans spaurgnî, ça profiterè à d's-ôtes !
On trove qui t'ès trop bièsse, c'èst pace qu'i t'ès trop bon !
Au drwèt do sintimint, c'èst sovint l' fwace qui compte.

Albert Delvaux

Mârs 2013.

Grèyî : barbecue.

Fé payîye : faire un gueuleton.

Rastacwêre : dévoyé.